



## JUDICIAL SYSTEM MONITORING PROGRAMME

## PROGRAMA DE MONITORIZAÇÃO DO SISTEMA JUDICIAL

### *Komunikadu Imprensa*

**Periodu : Agostu 2010**

**Edisaun : 08, Setembru 2010**

### **Vitima Masacre Bob-Uf Tumin Ejije Harii Museum kompleita ho seguransa**

Judicial System Monitoring Programme (JSMP) liu husi Unidade Programa Observasaun Parlamentu (POP) iha Quarta feira 25 Agostu 2010 liu bá, hala'ó Fokus Group Diskusaun (FGD) konabá Esbosu Lei Instituisaun Memoria no Esbosu Lei konabá Reparasaun iha fatin Masacre Bob-Uf Tumin, Suco Bobometo, Sub Distrito Oe-silo, Distrito Oe-Cusse.

Luis de Oliveira Sampaio Direitór JSMP hateten, objetivu husi FGD ne'e atu fahe informasaun no rona direktamente idea ka opiniaun husi vitima vulnerabel sira ne'ebè laos kategoria veteranus ka idozus atu fo sira nia hanoin relasiona ho esbosu lei instituisaun memorial no esbosu lei reparasaun ne'ebé sei fo benefisiu ba sira.

Enkontru ne'ebè organiza husi JSMP ne'e, hetan entusiasmu makas husi vitima sira. Maske foun xefe suco Bobometo limite atu hili deit ema nain 30 wainhira JSMP to'o iha fatin FGD participantes barak liu hamutuk 78 mak hakarak participa hodi rona informasaun.

Fokus Group Diskusaun hamosu rekomendasaun lubuk husi vitima no familia vitima sira iha Masacre Bob-Uf Tumin hanesan tuir mai ne'e;

- Vitima ejije ba Parlamentu Nasional atu tau matan ba ema sira ne'ebè lakon sira nia vida iha tinan 1999 liu-liu iha lora 8 to'o 9 fulan Setembro 1999.
- Husu ba Parlamentu no Governu atu harii museum kompleita ho monumentu ida iha fatin Masacre hotu-hotu, liu-liu ba Tumin, atu nune bele haloot sasan faktus hanesan Kalsa, Kamiza, Tali, Sintu, Kadeli, vitima sira ne'ebé ema oho no oras ne'e sasan hirak ne'e sei rai deit iha kaixa Supermi.
- Husu mos ba governu atu rekruta seguransa permanente iha fatin masacre hotu-hotu liu-liu ba Tumin atu nia responsabiliza hamos no hein monumentu inklui museum ne'ebé atu tau sasan vitima sira nian ne'ebé konsidera hanesan memoria.
- Husu ba Parlamentu atu hari'i eskritoriu nasional ida ne'ebe independente inklui eskritoriu distrital ba vitima hotu-hotu inklui eskritoriu ida iha Distrito Oe-Cusse atu nune'e bele implementa direktamente esbosu lei rua ne'e ba sira vitima iha futuru.

- Vitima sira mos husu ba Parlamentu no Governu wainhira Prezidente Repúblika promulga tiha lei rua ne'e tenke sosializa to'o iha vitima sira iha baze.
- Vitima Bob-uf ka masacre Tumin rekomenda ba komisaun A Parlamentu Nasional no ba meja plenaria parlamentu atu hahu ona diskute konabà esbosu lei rua refere iha fulan Setembru ka Ototbru 2010.
- Vitima masacre Tumin mos ejije ba estado Indonesia atu kontribui mos fo reparasaun ba vitima sira iha Timor Leste.
- Konabá justisa vitima Masacre Tumin entrega responsabilidade tomak ba estado Timor Leste no Indonesia atu prosesa autor krime grave sira iha futuro.

Direitór JSMP hein katak, hosi rekomendasaun ka ejijensia sira ne'ebè vitima Masacre Bob-Uf Tumin hato'o ne'e membru Parlamentu Nasional sira bele konsidera atu akumula sira nia hanoin iha esbosu lei Instituisaun memoria no esbosu lei reparasaun antes aprova hodi responde duni vitima sira nia preukupasaun.

Luis de Oliveira Sampaio mos reafirma nafatin JSMP nia pozisaun katak tenki iha justisa ba autor krime grave sira maske vitima sira hakarak entrega responsabilidade tomak ba estado Timor Leste ho Indonesia hodi prosesa autor krimes sira.

Atu hetan infórmasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883